

聖濟總錄纂要

全共十本

序

醫者意也古人多不肯著
書然肘後禁方又無不神
驗者書果可盡廢乎哉歷
攷載藉以來藝文所志軒

岐家言無慮數十百種要
皆通人畸士卓然有傳世
之識而後發爲文章按部
就班處方立案嘉惠來學
其道與六經相表裏近世

學者狃於所聞守師承執
一之見其言固陋而不能
以相通自誤誤人弊至莫
可紀極無他讀書不博見
道不真用心不廣坐是三

者而醫道或幾於熄余戚
友程雲來氏鄆山世胄也
少從其叔祖敬通先生講
越人之術先生道高望重
名滿天壤雲來與之遊處

者十餘年盡得其真傳秘
授又其先明初有松崖公
者以名進士起家一代偉
人精星象奇門岐黃術著
有醫案等書雲來皆宗法

之故於方書無所不讀研
窮考究殫精竭思以與古
遇出而仁民利物稱國工
鉅手焉歲辛酉余遊維揚
邂逅雲來於廿四橋頭蓋

方以校訂聖濟總錄一書
畱此者幾一載矣旣而向
余曰是書始末甚異幸爲
我序而傳之余覽其發凡
而觀其用心雲來之不朽

無疑也夫雲來以名家子
負才倜儻博與多奇間以
餘情溢爲圖篆繪事得異
人授內養晬穆顏如渥丹
至生平醫道所入輒梓所

著諸書不名一種散布人
間藏之者若寶籙然挾此
才技安往不足以垂名立
教而顧以是書爲斤斤其
立心誠欲利濟天下如范

文正所云不爲良相卽爲
良醫是宜不朽者一雲來
得讀是書刻本於敬通先
生所又三十餘年之久始
從友人江子郢上再覩抄

本遂慨然有剗剗之志而
不欲自專其美推原究極
詳著師友之淵源是宜不
朽者二且是書自宋徽宗
政和年間詔集海內名醫

出御府所藏禁方秘論纂
輯成編非人世所恒見閱
年旣久漶漫隨之雖再刻
於金大定三刻於元大德
重以耶律楚材之論定頒

行終無解於若滅若沒之
數非雲來孰能表章及之
者是宜不朽者三雲來以
三不朽之盛心又慮卷帙
之繁重於是刪訂收束以

便行笈之可攜知古今之
不一其宜也於是酌損裁
成以定規條於可守鴻編
鉅典恃有雲來爲之發皇
矣雖然醫者意也書不可

盡廢而亦不可徒泥陳言
顧用之何如耳如或守一
偏之見而不知變通雖日
誦是書復將奚益又當進
求雲來自著之心傳而後

可也

時歲次庚申花月旣望同
邑年家眷第吳山濤頓
首拜題

